

**Isumaginnittoqarfiup aqunneqarnera aaqqissuussaaneralu pillugit Inatsisartut
peqquussutissaattut siunnersuut**

pillugu

Inatsisartut Isumaginninnermut Suliffeqarnermullu Ataatsimiititaliaata

ISUMALIUTISSIISSUTAA

**Peqqussutissatut siunnersuutip appassaaneerpeqarnerani
saqqummiunneqartoq**

Inatsisartut Isumaginninnermut Suliffeqarnermullu Ataatsimiititaliaat
suliarinninnermini ukuninnga inuttaqarpoq:

Inatsisartuni ilaasortaq Asii Chemnitz Narup, Inuit Ataqtigiit, siulittaasoq
Inatsisartuni ilaasortaq Ruth Heilmann, Siumut
Inatsisartuni ilaasortaq Vittus Mikaelson, Siumut, Ruth Heilmannimut sinniisussaq
Inatsisartuni ilaasortaq Mikael Petersen, Siumut
Inatsisartuni ilaasortaq Jakob Sivertsen, Atassut
Inatsisartuni ilaasortaq Loritha Henriksen, Kattusseqatigiit

Inatsisartut Isumaginninnermut Suliffeqarnermullu Ataatsimiititaliaata UKA 2001-
imi siuller-meerinerup kingorna isumaginnittoqarfiup aqunneqarnera
aaqqissuussaaneralu pillugit Inatsisartut peqqussutissaattut siunnersuut nassuiaatitai
ilanngullugit misissuataarpaa.

Tusarniaanermi akissutisiat

Siunnersuutip ataatsimiititaliami suliarineqarnissaanut atugassanik tusarniaanermi akissutisiat nuutinnerinik kiisalu tusarniaanermi akissutisiat pillugit allakkiamik ataatsimiititaliaq piniarsimavoq.

Isumasioqateqarluni ataatsimiinnerit

Aammattaaq ataatsimiititaliap siunnersuummik suliarinninnerminut atatillugu Isumaginninnermut Suliffeqarnermullu Naalackersuisoq isumasioqatigalugu ataatsimeeqatigaa. Isumasioqatigiilluni ataatsimeeqatigiinnissamut aggeqqusissut isumaliutissiissummut matumunnga ilanngussatut inganngunneqarpoq.

Siunnersuutip imarisai

Siunnersuummi pingaarnertut allannguutaasussat ataatsimiititaliap misissorpai imalu oqaaseqarfigissallugit:

Peqqussutissat siunnersuummi erseqqissaatigineqarpoq kommunalbestyrelsi aalajangigaa Isumginninnermi Naammagittaalliuuteqartarfimmut naammagittaalliuutigineqarsinnaasoq, taamaalillunilu nalornissutaasariaarutissalluni suliat kommunalbestyrelsi sinnerlugu aalajangigaasimappata politikikkut allaffissornikkulluunniit aalajangigaasimanerat apeqqutaatinnagu Isumaginninnermi Naammagittaalliuuteqartarfimmut naammagittaalliuutigineqarsinnaanerit.

Tamatuma saniatigut suliat, illersorneqarsinnaasumik tunngavissaqarsimappat aammalu aalangiinissaq nalorninaateqanngippat Isumaginninnermi Naammagittaalliuuteqartarfimmut saqqummiunneqaaqaratik, siulittaasup allakkatigut suliarinninneratigut aalangiiffigineqarsinnaalernerat siunnersuutikkut periarfissinneqarpoq. Periarfissaq taanna ataatsimiititaliamit assut iluarisimaarneqarpoq, naammagittaalliummimmi aalangiiffigisassamik suliaqarnermut atatillugu eqaatsumik suleriaaseqarnikkut pilertortumillu aalangiisarnikkut innuttaasut inatsisitigut illersugaanerit nukittorsarneqassamat. Taamatuttaaq naammagittaalliummi aalangiineq pisinnaassaaq suliaq innuttaasumut suli pingaaruteqarallartillugu.

Aammattaaq siunnersuummi aalangersakkamik nutaamik ilanngussisoqarpoq, tassuuna Naalackersuisut kommuunini ataatsimiititaliani ilaasortanik sulianik isumaginninnermut tunngasunik suliaqartunik pikkorissaasarnissaminnut periarfissinneqarlutik. Tamanna Inatsisartut Isumaginninnermut Suliffeqarnermullu Ataatsimiititaliaannit iluarisimaarneqarpoq. Peqqussutiniq isumaginninnermut tunngasunik sukumiisumik ilisimasaqarneq innuttaasut eqqortumik ikiorserneqarsinnaanissaanni pingaaruteqarluinnarpoq.

Ataatsimiititaliali Naalackersuisut kaammattussavai siunnersuutip aappassaaneerineqarnissaanut allannguutissatut siunnersuummik

saqqummiussaqaqqullugit, taamaaliornikkut § 5-imut oqaasertaliunneqassalluni Naalackersuisut kommuunini ataatsimiititalianik sulianik isumaginninnermut tunngasunik suliaqartunik, kommunalbestyrelsimut nutaamik qinersinerup kingorna kingusinnerpaamik ukiup ataatsip qaangiutinnginnerani, pikkorissaasarnissaminnut pisussaaffilerneqarnissaat. Tamatuma kingunerissavaa ukioq 2001-imi kommunalbestyrelsimi ilaasortannngortut nutaat 2002-mi pikkorissartinneqarnissaminnik neqeroorfigineqarnissaat.

Ataatsimiititaliap siunnersuummi § 1-imik oqaluserinninnerminnut ilanngullugu siunnersuutip § 1, imm. 2-a sukumiisumik oqaluseraa, taannalu ima oqaasertaqarpoq:

§ 1, imm. 2. "Naalackersuisut nakkutilliinerup qanoq annertutiginnissaanut ingerlanneqarnissaanullu erseqqinnerusumik aalajangersagaliorsinnaapput."

Ataatsimiititaliap paasinninnera malillugu nakkutiginnittuusaatitaanerup qanoq annertussuseqarnissaa nakkutiginninnerullu taassuma eqqortinneqarnerata qanoq ittuunissaa annertuumik narlonissutaapput. Taamaattumik ataatsimiititaliaq isumaqarpoq aalajangersagaq taanna erseqqissaavigineqarlunilu pinngitsoorani malitassanngortinneqartariaqartoq, taamaaliornikkut kommunit isumaginninnermut tunngasunik malittarisassanik ingerlatsinerat pillugu nakkutiginninnerup qanoq annertutiginnissaanik qanorlu ingerlanneqarnissaanik malittarisassiornissamat Naalackersuisut pisussaaffilerneqassapput.

Taamaattumik ataatsimiititaliap Naalackersuisut kaammattussavai siunnersuutip aappassaaneerneqarnissaanut allannguutissatut siunnersuummik saqqummiussaqaqqullugit, taamaaliornikkut § 1, imm. 2 ima oqaasertalerneqaqullugu:

§ 1, imm. 2. "Naalackersuisut nakkutilliinerup qanoq annertutiginnissaanut ingerlanneqarnissaanullu erseqqinnerusumik aalajangersagaliussapput."

Inatsisartut Isumaginninnermut Suliffeqarnermullu Ataatsimiititaliaatattaq Inatsisartut Ombudsmandiata 2000-imut nalunaarutaani immikkoortoq 4 innersuussutigissavaa, tassanimi suliarineqarmat Namminersornerullutik Oqartussat isumaginninnerup iluani nakkutiginnittuusaatitaanerannik apeqqummut tunngasumik suliaq.

Taama oqaaseqarluni ataatsimiititaliap isumaqatigiittup inassutigissavaa isumaginnittoqarfiup aqunneqarnera aaqqissuussaanageralu pillugit Inatsisartut peqqussutissaattut siunnersuut ataatsimiititaliap siuliani kaammattuutigisai naapertorlugit Naalackersuisut allannguutissatut siunnersuutaasa saqqummiunneqareernerisa kingorna iluseriligassamisut iluseqarluni akuersissutigineqassasoq.

Asii C. Narup
siulittaasoq

Vittus Mikaelson

Mikael Petersen

Jakob Sivertsen

Loritha Henriksen